

卷之三



瑶草園初集卷之二

陸宗伯五十壽叙

陸宗伯五十壽叙

陸宗伯五十壽叙

武林吳之鯨伯霖甫著
門人聞啓祥子將甫校

陸宗伯五十壽叙

蘭溪葵日陸公以天精之光佐明而現雲騫霞蔚功用聿興頃以孺慕不匱養高家食
聖眷方隆賜環在望而年始艾今歲丁酉季冬某日
實其攬揆之辰二三子之受知於公者謀諸副

墨以侑稱觴夫瑰辭繁稱而無當於道不足以
諧律呂不佞卽少文敢越六籍而節枝言以辱
捧觴者哉在禮五十曰艾服官政唐孔穎達謂
服政爲專事其官明主握樞衡以別於強而仕
者也古者凝丞輔弼稱天子之四隣如天有四
時實灌輸政令以資百昌萬彙之鼓舞至今簡
命特重官惟其人未聞引年授職者學人士亦
得時則駕耳安得一一按禮言以取券於左哉

乃今覩計於公何如公方入中秘續食太常修
天祿石渠之業甫壯也摘菁採藻鳴太平潤金
玉纂勒正史成我朝千秋不磨之典二十年來
稱親信文學之臣公逢年抑何蚤歟而公恂恂
若不勝務修諸闇居恒陶淑禮樂被服忠赤自
天性比德以贊事儀圖惟肖安在乎年之豐約
舉也卽所撰聖德頌上以備九重之金鏡而游
濱遐蒞咸至被之絃歌 主上聖明特嘉褒美

尋推爲兩都國老晉秩宗儲將懸公孤之位以
待服政而公復三年淹以及於艾禮其爲公設
耶蘭芷一朝而稱國香榿栴十年而稱國棟遲
速雖殊要於植性無爽也公旦夕應蒲輪且及
於政如恒之日光明廣被四隅黎庶方與曾業
衡陽之照而逮於旦也公一一以陶淑被服者
園運而臚布之天下想見公者一一以爲追琢之
璋一一以爲未雕之璞一一以爲百煉之剛一一以爲

嬰兒之柔總根核於天性將亦符之禮而謂艾
而始習者哉昔荀卿年五十始遊於齊齊亦尚
修列大夫之政間嘗據諸生之席三爲祭酒而
論道論性多醇疵互見不敢窺孔孟之廡要之
沉鬱憤激亟自炫其竒遂不免與炙轂雕龍埒
如公厚積蚤發受知明聖爲天下所瞻望倚毘
直且弘宣國家中天之運以攄光華令孔孟之
言尊於日月其服習有素其展錯有時彼偏駁

畸語曾何足當公之萬一而矧其空言無用者哉乃公之生實維嘉平之辰夫冬月氣盛於西北記曰此天地尊嚴氣也象義而左氏之稱趙季曰冬日之日也謂其溫煥煦育足以宜人也象仁公大節凜凜而飲和比於投醇邈所降誕豈非稟天地仁義之氣者哉南山之頌君子一則曰邦家之基再則曰德音是茂而申以保艾爾後古人之善頌固爾也不佞不敢擬古人竊

得揄揚公之仁義以自比於藹如則不佞實有幸厚焉願申保艾之祝

小川葉太公七十壽序

嘗讀紀載慕王彥方戴叔鸞之行瑰瑋縹帙于載下猶挹其清風顧彥方能令人愧叔鸞能令人懷所居百里內至不復有忿爭竊攘之事而未聞其慷慨佐急輸百千如流或者清搯孤潔力有所制耳乃王元寶以帛繫南山樹樹盡尚

有餘帛鎮州王酒胡助修安國寺連槌百鐘運
錢十萬貫入寺至使人主引與敵體又何以稱
焉要其挾貲自豪非必仁心爲質篤行慕義闇
然好修者萬石君父子兄弟孝友醇謹累世不
替此真保家令軌而識者猶以逡巡數馬爲善
居功名之盛不應公叔專愚一至於此噫古今
同量人富而仁義附焉豈虛語哉苟鄉閭高節
行誼矯矯不欺善息其廉五之業而樹德無厭

如小川葉太公者足術矣太公世居姑蔑之遂
昌派自石林爲邑里冠冕父封公坦庵先生三
舉子長筆陽公成進士授水部郎季膺貢入成
均而太公居孟季之間獨謝鉛槧搯筦鑰視家
人產惟謹旣漸息其竒羸獨儉朴自天性簪冠
革履鮭菜芹菹循墻負劔不妄進一步而節俠
自喜卽疆禦不避臨大難剖大事怡如也事父
母醇孝爲封公求萬家之阡不以孱弱自寬封

公察其賢勞以穴傍善地予仲念水部公無所
置羨石公卽以讓兄無恡色人咸愚太公奈何
輕棄吉兆太公不顧也性友愛族弟方新者食
貧公爲足食更恤其藐孤兩爲室而莫教賴以
不餒歲侵司土者議賑公首倡輸七十石里中
聞風競勸所活數萬人自本邑所經溪渠水暴
漲洧洧爲苦以所設義渡爲宋礮口爲獨山爲
焦灘悉設便宜築墩造舟通往來如康莊又爲

置義田給操舟三老墩渠屢費屢葺桴筏鱗列
事不經久不已也旣復念渡口無蔭暑雨處爲
建川上亭通濟亭峰巒照射喬木掩映口碑載
路矣他若建義倉東梅橋仁濟橋通津駐節重
興遂昌學宮所費累數千金俱出公本懷所造
福甚鉅而公無德色前後邑侯湯公別駕段公
郡守郭公守道曾公咸高其誼給官服以爲隱
居嗜義之勸而公置冠服不一御曰吾第五不

減驃騎乃以冠紳易布衣乎子姓故英多孝廉
賢良之裾相襲公建育英樓前按筆峰後倚天
馬給膳田七十畝以克焚膏之資而子姓益彬
彬嚮學復爲永孝祠以識不忘封公意詩書愈
蔚然隆茂矣如太公者所爲志節耿耿好施不
倦輸百千如流而不以豪逞又何愧彥方叔鸞
萬石君諸人哉今年春秋七十八月六日爲太
公攬揆之辰而膝前濟濟玉立蓋五丈夫子十
一孫兩曾孫矣公子煨孫長坤長陞俱哀然青
衿坤且登諸生高等食廩餼有聲六翮已就太
公行誼隆厚使鄉閭畏其端方懷其渥澤司勲
氏廉實以上當有

天子之璽書以章榮寵宜乎公之不以耆老冠
服自詫也漢世何少卿素有善行一日夢貴客
車騎滿門甫覺而門有老嫗求寄避雨謂少卿
曰公有陰德今天錫君策以廣公之子孫因出

懷中符策狀如簡長九寸凡九百九十枚以授少卿子孫佩印綬者當如是筭言訖不復見後汝陰平陵代爲名族以余所聞葉太公義甚高所施更僕以數旦暮間當有授策者至予言其徵矣太公尚命司閤勿拒避雨老嫗可也

來母楊太夫人八秩壽叙

鯨自束髮論交卽知有西陵來夢得博綜淹雅恂恂篤行君子也敦孝友立然諾有古人風心

嚮往之迨甲午始獲交於夢得再越歲覩其長君昂昂千里駒比復從華亭合范叔之好尋游於季方因知夢得同生有五人金昆玉友皆其母夫人督成之時時以未展登堂之禮爲歉而壺儀母範則洽於宗人播之通都知夢得范叔者無不知有母夫人者也夫人出於楊兄應元舉進士爲昭景冠冕性貞靜勤敏喜讀書七歲受內則孝經諸子史過目成誦十七歸觀吾先

生方食貧堂上二人老矣夫人拮据相夫脫簪
珥具甘膳色養後先如一日夜則篝燈佐讀觀
吾先生雖斬一第然績學樹行藉甚至今郡以
內數儒林文苑率兩推觀吾先生者夫人實贊
贊襄焉課五子各有專業出告反面一稟於禮
合爨同心歡如腰鼓家政井飭處繁劇若磊落
丈夫而文學自天性稍暇卽以典籍自娛不釋
手今年五月四日稱八十初度形神矯健無異

少壯時者則不佞鯨竊有概於母夫人而爲夢
得昆季沾沾喜也夫夢得兄弟競爽自少韞櫝
六經服膺道術懸書國門能令紙貴母夫人日
冀其成夢得所圖爲母夫人壽者寧不以鐘鼎
馳念乎而鯨不謂然士明經亟功名謂有所建
不朽耳如古所稱斑斕美雖不殊嬰兒陶然天
倫之樂其視章服何有卽令夢得昆季蚤通籍
勤於四方徒以陟屺煩八十老母此中能無悵

然又如景讓之假朴責不疑之減七箸以視夢
得子婦各五諸孫擁侍次第奉觴婆娑笑舞協
於鈞天之奏孰爲得也母夫人嫺書史通經義
何減義成夫人然師氏特以子發善事新莽賜
號卽金印紫綬文軒
戰衽以污母氏耳楊夫
人明達貞淑必不效
氏夢得繕修具備必不
效李雋設依人立名
乃以截髮剝薦勞母氏
起居而夢得范叔名
海內所至讓席曾不屑

一游於大人以此娛母夫人綵衣雖舞豈不勝
陶士行十倍耶雖然天生賢母以育成夢得昆
季復老其才以需大用三公其所自致但恐不
免耳則夢得昆季所爲娛母夫人者自有在不
佞鯨第謂今日夢得昆季爲母夫人八十壽何
不稱人倫盛事也楊之先有泰瑛善誨流於三
世時人爲之語曰三苗止四珍復起今夢得昆
季且奮翼而諸孫蔚起未艾足爲楊夫人道矣

鯨方讀書洞庭夢得之宗長某公等介周生錫
圭書索鯨一言爲夫人稱觴之言何
足重楊夫人哉使鯨之言誠足爲楊夫人重則
夢得昆季今日足爲母夫人壽鯨言愈有徵矣
敬邀靈於林屋洞天從夢得昆季及其宗某公
等獻楊夫人千秋之爵

山高水長圖爲胡元敬先生六秩壽叙

夫世之尊有道者極矣其所宣示爲道言所踐

履爲道範生之色爲道貌鬱郁莘莘眠傳形而出
者爲道氣而氤氳披拂映射於形與氣之間若
可見若不可見者爲道韻舉尋常之所聲施而
冠之道則口謝不敏而中實自愉間嘗以語今
之人凡門戶之赫奕位遇之都顯才能之揮霍
意調之軒舉咸願享其實而不必居其名惟號
之於人曰此有道之士而後喜可知也尊之極
故多溢稱稱愈廣而實由此愈約矣然當世自

有真者如余所聞元敬先生則真有道君子也
余與休復交且十五年亦嘗兩登其堂而未得
一望見先生以此爲歉顧熟先生行誼蓋彷彿
其鬚眉若或見之而信其真有道君子也先生
生於胡而育于隣之丁母以就其乳哺以至舞
象舞勺則丁窘極不能具朝夕矣時先生伯兄
中丞公已舉於鄉有吏之者曰曷不返其天顯
之歡而自苦爲先生急噤止之曰吾無丁母無

以有今日丁母無我無以終餘年且丁之纍纍
淺土者俱吾事也私自念孑弱善病不可以俟
他日趣篋中堪易一二鑲者悉捐之滿三十金
則身自荷重與力作雜進封馬鬣而淚泫泫下
至今蒸嘗必先及之丁母性卞急先生怡柔以
娛之受醮呵惟謹母爲摩額媯然喜乃已母病
癱先生躬侍澣濯稱水量藥非先生手調不入
口病隨愈蓋終其身先生不知非母出而母亦

忘其非已子至於左右就養曲殫其誠卽白華
蓼莪之思不踰此矣噫苟非天性純篤能沒齒
如一日哉先生蓋先立其大矣然先生凜然不
自多也少食貧以廉起家不減計子峯而先生
蕭然不自有也讀書談道夷猶佳山水彌月忘
返嘗問學於敬菴許先生之門先生引爲小友
出處大節多與諮略而先生冲然不自得也里
中有素昧平生者一旦謁門願以身後爲託先

生跽謝曰公知我我向來獨不知公卒以此愧
公竟爲綱紀其喪而以餘貲給其妻人有過惟
恐聞於先生以爲甚於市撻請質片言爭端立
解咸稱王彥方陳仲弓今有其兩邑侯吳公至
虛席延爲賓飲而先生退然不自當也休復續
學飭躬吾黨稱其行爲金玉而文爲珠璣青雲
其所旦暮致而先生淡然不自期也有兄中丞
而不以第五顯有子休復而不以燕山詫門內

雍穆恂恂孝友而不以數馬稱衣冠必肅燕私
必慎而不以循墻著壯而喪其元妃獨居三十
年無變童季女之好褪身如奉盈而不以陽道
州自埒探討真如悟徹心性等知塵勞俱幻慧
覺亦空逍遙人世以還其真如先生者實當世
有道君子矣今年及耆攬揆秋仲休復爰執咸
思爲先生壽而謀之冰玉山人曰山阜岡陵川
之方至此壽徵也盍啣諸啣旣成命鯨以一言

弁其首鯨颺言曰無溢稱於天保之章也山高
水長足以壽先生矣

柴仲美先生耆壽叙

客子問樂朗士曰有天倫之樂有台鼎位望之
樂有翰墨研賞之樂有高華豪競之樂有幽恬
清寂之樂有寄境借適之樂有表裏俱暢之樂
略備矣皆造物所司不輕予人予其一必虛其
二更復望其三乎而如柴仲美先生疑爲造物

所偏厚也先生爲侍御醴泉公仲子孝友雍睦
振振繩武公謝政家食婆婆板輿先生豐頰白
皙綵衣奉觴群從雁行望若雲錦甫盛年舉五
丈夫子且有孫復有曾矣後先燦映如玉樹臨
風芳蘭遶砌天倫之樂他足以易耶名位有基
得時則駕曰匪於躬世濟其美柱史凜凜霜鉞
至今聲施而令子儒林籍甚仲君弱冠登賢書
怒飛之翼咫尺九萬頃賢孫甫十五已隸邑弟

子藉追風逐電之氣超乘而前皆先生之教也
何非先生之樂乎先生夙負雋資觸景抒素書
倣南宮詩追陶白騷壇刻燭黛席傳籌妍賞之
樂洵云三矣若乃五陵七貴閨品炫竒霧縠削
以成帷竹肉傲其高下登塲擅勝萬譜俱焚細
韻輕吹千人共廢謝傳欲停周郎已顧蓋自先
生所至而肩摩轂擊濡首欲狂髡心最歡此樂
無有珊瑚鍊帳徒豪舉耳時或茗椀博山盤松

爰石清簡之士偶集蕭齋鳥啄不喧塵尾乍拂
先生以此息機而樂有其五矣夫造適不及笑
獻笑不及排寄者借者皆偶然而未必竟有之
者也先生兼總勝緣推爲祭酒旣用自適亦能
適人風日忽開芳英半吐咄嗟命具學語新鶯
成措大一日之歡施爵人撥悶之藥此衆樂樂
也而不爲先生樂歟晉人云人言愁我始欲愁
其天全矣然尚未免愁累先生履泰席豐謙冲

善下純白內備天和外揚處家肅如朝典而膝
下自成雖叶之儀課讀急如望歲而令胃不煩
督責之苦金缸絡帶晨星漸稀凍雪涼飈嘉賓
脫屣安素位之所有俟天祿之荐至卽人言愁
亦何知愁耶則表裏俱暢尤造物所靳而私以
授之者也客子靦然笑曰朗士游於先生父子
間互爲伯仲宜其善言樂且善言先生也壬子
四月廿七日先生及耆長生久視之方舍樂無

兩願以朗士之言爲先生壽

紹楊張隱君六棗叙

善乎匡衡之疏治性也夫理情比德導其壅滯而合於貞飭則治身而身康閑家而家泰助勸天下而天下安以至久視長生錢彭松喬之術未有不本性情者故粹養之士闇修而不務聲施其所會深矣迺今於紹楊而竊企其契治性之旨也公九歲而孤事嫡母篤孝弱冠就賈相

其盈縮與時高下善因勢而導之純白自守而機智不設有就與爲諾責者片言不易饒鼎人見其悃樸而生愛心見其莊嚴恂慎而生敬心欣欣然願託肝膽敦久要業日益起而忠誠日益著蓋公素所善者爲胡玄敬先生先生有道之士也公每事做而行之故墳簞篋伯仲如一人孩童至白首如一日左提右挈其玉於成出艱辛歷亨嘉四十年無間言褻處必相敬造次必

初集 卷之三 十七
相呼歡然告成而始分業焉君子哉卽朱陳之
論交韓范諸君之立朝不過是已嚮非聞道者
或此唱而彼不和安能處脂無兢同心澈底而
力行古人之操於叔世恪守大儒之風於闡闡
哉胡先生之子爲休復旣登賢書文譽藉海內
而公之子無疆志弱而骨強體樸而文蔚隸籍
博士員聲津津起矣則天之所以報兩公者其
亦感於和之能召而金蘭漸漬其未艾歟迺公

性尤有牕草盆魚之好家構一閣列蒼松綺石
其下植昌陽及蘭蕙水僊杞菊之類多者至百
盆許燥濕以時芟剔澆灌皆躬爲之每當春夏
之交花發葉稠周環廣堂綠縟可把翠色交加
客且忘歸而公亦色喜若獲拱壁噫人知公寄
趣幽勝而不知公之理情比德範於貞蘇實有
合焉而非徒玩好已也今年臻六十嘉平十二
月爲攬揆之辰公子無疆從余姊子爾宣游最

久亦游余門吾兩人計所以爲公壽而不欲以
豐綺之謾詞進也則爾宣稱公大都而余亟爲
讚羨亟爲紀述敬以數言附奏觴者之末
養初錢徵君六秩壽叙
夫六經菽文之盛莫備於兩漢而其時所馭爵
祿者顯重孝弟力田德行之章聞爲善於鄉旌
善於朝旦而布衣夕而軒綬無屈首受書之勞
而坐有其逸今之士莫不由六經進矣雖有姱

修安博青紫而愚嘗默參天人之會則亦未至
懸殊也布衣闇修昔或以辟召而增勵今必不
以選舉之不至而加貶而和能致祥善積餘慶
不於其躬必於其子造化之秘亦若潛操其勝
以相符券者倘歷代人主特互尚以應天心之
定歟今於養初錢徵君益有信矣君孝友天植
事二親以逮親之親曲盡情志宗戚中待以舉
火者爨烟欲清初挾筴游苧城廉也五之以義

爲質苧城知不知咸推君長者比返武林卜築
比墅業愈充道愈廣有徼君餘潤以自給者無
不致金錢如儲舟車南北之會若江淮間信季
布矣而君退然不居也恬雅溫藉類有道之儒
喜客茗椀酒槍咄嗟而具晝夜務畢其歡喜奕
勝負咸適喜書子墨客卿所遇無不倒屣華亭
袁履善先生服竒行古不輕與人周旋獨善君
朝夕最洽以及非之先生三世墳簞而張叔翹

洪子厓兩使君俱歡好數十載無間言則故鄉
可知而君豈闐闐中人耶然君有子矣韶令倜
儻嫻於文辭日與賢者處養閎而采益彰雲翼
怒飛近在眉睫頃已隸博士弟子籍君生平尊
賢敬士宜享其報而何不足爲天人契也君今
年六秩五月某日爲攬揆之辰概君碩行宜詔
漢爵今以貽之令子而未必不身自有之愚將
以鸞章爲證以勸世之闡修而嗟逢年者矣君

之壻翁積之不佞及門之士且吾甥也青雲之業英英挺上此亦君之波及而爲君佐券者乎君其強飯養恬以俟余言之信

五瑞圖爲聞老夫人五秩壽

余自丁酉獲交聞汝東卽稔知其配夫人內行詳矣汝東性恢廓善赴人緩急不避艱險而夫人佐之行義解佩捐珥無所恡汝東喜賓客大類孔文舉陳孟公而夫人佐之親賢擊鮮供帳

庭外不喧而咄嗟甚設及其子子將隸博士藉文譽蔚起四方履日滿乃夫人列難俎精漑毫無虛晷抑何靜治勤渠也意念深矣汝東尊人九十五翁治家嚴而有法而夫人佐之盡孝克當舅姑心及庶母以耄終汝東情禮備至而夫人佐之竭誠悃虔禮事蘋藻必躬必預子將有友客於家病陡發不可治汝東父子延醫禱萬端爲殫殮如禮以歸而夫人佐之給參朮施幘

綴毫無難色此豈婦女所行易觀者哉如夫人
少有後言卽汝東子將安能竟行其意是非但
俠骨實有道念者也汝東兩子二壻督誨殷至
而夫人佐之以慈撫楊倩七歲以及夭折而愛
之甚於子將今之撫藐諸如倩在也汝東敬信
三寶放生戒殺而夫人佐之誠潔晨夕頂禮佛
號香燈惟謹汝東敦睦姻黨比洽鄰好而夫人
佐之修禮歲時不愆如天人者旣饒鷄鳴靜好

之德復備雲霄丈夫之概壺範孔愉媿行未艾
汝東有嬾子將有母倚歎都哉今年八月一日
壽五秩日月方茂其佐汝東以玉成子將兄弟
者始基之耳親知鑊金購五瑞圖具觴稱慶而
不佞以一言爲侑曰載藉稱賢母必推仇氏湛
氏然皆不稱其父今夫人媲美前軌而有汝東
爲同德又饒給無三遷之勞截髮之窘則夫人
旣有懿聲復際隆盛夫人不更勝昔賢乎何俟

翟翹霞帔乃稱榮也願夫人滿飲此觴汝東喜
極命子將以客之觴觴夫人因授客卿弁圖之
首

夏隱君姊丈六秩壽叙

不佞鯨同生僅一女兄秉德幽閑貞靜爲壺範
宗楷先貞慈極憐愛之年十五歸小溪稱賢倩
益隆歡好夏本江許望族締姻俱名胄家蓄藝
鼎鑄壘名畫法帖子史百家書甚夥其尊人樸

愿有吉人風至吾姊丈而嫻於文彩彬彬雍穆
吾姊丈性亢爽倜儻而吾女兄濟以柔和如鹽
梅之調家道益蒸蒸起兩丈夫子長治家園次
治公車俱用醇白端直以勿墜二人之訓孫男
女十餘輩歲時奉觴森森亭亭不減謝家玉樹
戚睦咸羨吾姊丈得賢媛以享於康厚而姊丈
今年登六十壽十一月廿三爲攬揆之辰迺其
神旺氣充才之敏贍興之穠洽特似強仕者則

期願可預卜何疑俟不佞鯨粗償書債與姊丈
及吾女兄日夕笑語爲自首人倫之樂視吾甥
青雲素封各娛其親何不怡怡也敬進南山之
爵
書玉麟人瑞冊後
吳江周氏稱令族冠冕至子嘉率諸舅奉其尊
人恂恂孝悌不減金昆玉友識者以爲恭肅之
後岱寶難盡子嘉素艱於子偶夢有告之者若

子當名瑄及舉子卽以名之迨攷家乘乃恭肅
公王父諱也因請名於陳眉公而眉公名之曰
瑞則其祖諱瑄者字宗瑞卜夢卜名兩俱竒合
如此南唐書載馬仁裕爲北平王燧雲孫其母
方娠夢傳北平王來及生紫氣光庭後勲名俱
與祖相埒余觀子嘉恬讓雍和喜交賢豪綽有
君子風自宜有令胤北平之兆當爲恭肅公繩
武何疑余樂爲紀其事并爲券云

李太母程太夫人八秩榮壽叙

代

郡侯侯官聚吾李公之來蒞杭也甫一載餘而
恩膏翔洽蔭暘吹黍士民熙熙咸游春臺心歌
膺詠樂在歸附不佞竊與縉紳父老園橋髦士
共被宇下每相稱嘆以爲我李公政潔令淳愛
民如子卽古所載召翁卿杜君公不是過也而
公母程太夫人春秋八十就養官舍十一月初
二日爲其誕辰公門下鄭生江生輩走幣於庭

徵余一言以爲太母壽夫獲隆施者必益報其
所生徵諸生之所請敢無一言以效南山之祝
蓋嘗反復傳紀以爲古良二千石最著者莫如
南陽召杜政務慈和惠逮氓育所在興思乃其
謠頌不過曰召父曰杜母而祖豫州稱慈父鄭
僑稱衆母以致男名賈男女名賈女若非是無
以效其顛戴者士大夫旣以身際明盛擁笏垂
魚何藉於田間蓬翟之稱父若母耶而愚民極

思無以踰此猶之曝可暖芹可甘亟祈以獻至
尊則家庭父子之稱感深矣在宋張齊賢母孫
氏年八十餘封晉國太夫人每入謁禁中上嘆
其福壽有令子多手詔存問加賜與朝紳榮之
則始知人臣抒誠奉公布天子恩信爲九州司
牧下逮黎庶以致其親而上及九重以榮其所
親榮及其親者天子爲小民報德而致其親者
小民爲天子奏功則又知父母之戴正榮及其

父母之所基也乃今觀於李公而知太夫人之
覆露吾杭者溥也公軼材懋學文采若雲月高
深若山海腹笥便便豐華稟采而背贈公早太
夫人實課督之柳丸湛髮手握鉛槧昕夕訓績
以底於成初令東筦太夫人與俱筦多盜令喜
鉅筭以察深爲能而李公獨務簡靜政如冰霜
姦宄消亡則太夫人實每事提衡之襄城不煩
至今有詠焉旣徵入司農曹則迎養太夫人於

京邸夙興趣事主計井飭退而弄雛奉觴上壽
衍衍如也杭介首藩中丞直指司轄鱗次而輜
軒之使往來旁午後先守此者非務刻嚴則多
叢挫而李公一意篤誠不尚文飭獲上信友率
以真心應之與民寬厚恂悞持大體不善吹毛
洗垢每當讞決多所平反蒲葦稍雲含哺雀忭
咸舉手籲祝曰太夫人有雋母之賢而我公能
養志於豫不復煩其密窺以爲七箸損益母稱

聖母公稱明公然則吾杭之煥冬日而披南薰
者秋毫皆太夫人教矣繁政害力莫知所懲而
公正已率物不猛而威道治德鑄俗益樂歡狐
有牙而不敢以噬貔有爪而不敢以獺則太夫
人之壺範施於有政凡我九邑之子若女非皆
太夫人所飴哺而噢咻之者乎而公尤廣屬學
宮定人倫鑒獎拔俊詰文雅縱橫一時諸人士
馳思泉涌敷藻雲浮卽文翁在理而相如稱吳

公治平而賈生起何以加茲則太夫人之所爲
左籤右軸督訓我公者且波及杭之子弟文章
禮樂之區科名蔚盛孰非太夫人道化所貽也
公已用循良高等蒙
恩綸錫及太夫人矣太夫人有令子用其言以
治身而身顯用其言以撫百姓而百姓習而安
之形神悅康天壽難老豪林洞陽紀踰摩狄可
以預卜而公理道方顯勲庸日積尋且以奏最

入佐樞筦二事九列憑軾而前太夫人益健七
箸

天子賜手書存問賚與當如晉國例公之榮及
其所親者將不趨五馬之榮而召杜能使民頌
爲父母不聞其母以賢稱則李公更勝之矣不
佞竊願以九邑之子民爲召父杜母之母夫人
祝蓋藉此以報召杜也諸生其進之李公以竢
左券

邵山人七十長生頌

宰相峰古菴邵居士後佛一日生萬曆丙申年
屆六十方內外士與居士游者咸捨供香花乞
雲棲大師於西湖舟中作放生慶生會爲居士
祈福延壽一時雲從咸踴躍讚歎於是鰕生吳
之鯨拜手颺言而爲之頌頌曰

萬物芸芸共游鴻鈞泰元媪神狃狃獠鯤鯪
麇麇戴天地仁晷弋何因翠羽鮮鱗樹招設餌

世網縱橫慈者垂手普利善根施自在食和頻
伽音如在重縛釋之自輕縛本無怨釋亦無恩
從上從下並育並行以彼無礙資我有情是宰
相峰縣處士星南狐爛然亦名老人占畝叶應
祝公長生其祝云何入山孔深命曰天放奚必
菖苓夷猶白閣舒卷黃庭金丹玉液小年大椿
造化於公別有處分願我衆諸不柵世纓養空
而浮以葆真君與居士友用天地存稽首世尊

李母程太夫人八秩榮壽頌

夫珠斗丹陽杓注長生之軸琅霄黃鶴響高茂
律之徵槐眉以奏瑤池琪桃薦實竹液以將玉
几巨棗如瓶皆能壽歷丹臺名標金格而足練
毓虞旗鈴兆昉神光照社應樞宜有佳兒天人
授書道陵誕由聖母用能瑞符杖錫祥發弧懸
烏爪擎漿不羨雲璈之麗曲龍文振鬣式彰象
闕之鴻聲德劭而笑益綿胤嘉而親愈顯於今

爲烈在昔有徵武林郡侯李公聚吾早歲蜚聲
邁請纓於弱冠壯而握綵俄占藉於南宮譽望
獨擅乎九州奏績先馳於五馬刑清政簡吏習
民安黔黎戴若夏雲逢掖依爲冬日而公母
勅封太孺人高年就養見齒含飴翟翹霞披何
異光明繒綺羅珍繡錯不殊璫珉芝英時維冬
仲明屆哉生實爲懸悅之辰用肇初陽之錫公
門人朱生輦范金作字裝錦爲屏開闔自然動

以象其端直抗承風露處必有其廉方賁藻南
濱奚取九華之塵移珍西岳不讓六采之綸雖
太夫人軌崇率已無用紫綃之帷而韋逞母義
折周官宜設絳紗之帳乃屬副墨徵役湖湄非
徒市以美言抑亦冀其善頌夫韻推積玉語埒
南金摘藻揚輝宣論詠德則辭之不可以已也
程太母誕賢能教舞象而誇石麟佐慈爲嚴尤
熊以啖繡虎斷梭而喻積學大器成於一經搯

臂而速來歸精誠通於百里而李公孝在不辱
事以無違從躬範其清和浴德儼乎祗慎入啣
鷄舌度支之會計惟勤出佩金魚刺史之風裁
聿勵懲貪戒暴市鮮飲羊尚簡敦誠國無害馬
風搖杏葉野人知佩犢之非露湛麥花童子有
遺鵠之念萑苻虛夜柝何須逸澗訪游禽桑柘
飲春膏共喜幕簾來社燕蒲鞭懸而不用秦鏡
用而常懸真所謂邦之神君衆之慈父勲隆於

不恃福罩於無爲者也而尤樸樸化人菁莪好
士下榻以延有道執象而鑄群蒙月旦出而髦
俊揚眉衡鑑昭而英賢露角聯躡風雅八能由
此並興歌咏太平四子於茲講德吐金含玉爛
然成章飛影擣光蔚乎煥彩雖車前雙鹿佐史
皆誦孝經城上群鳥賓從懼崇孝友恐未能鼓
舞勞來殷勤借獎由我化俗俗由我正文章聿
新有如李公者也當今直指觀風治平首列

聖主綸音

誕錫旃帛就徵公且入佐

承明內叅帷幄而太夫人持梁刺肥保艾平格
壘書褒問游登極品鵷班退食旣無四牡將母
之虞雛舞侑觴更饒五鼎承歡之樂巍庸膺秩
娑娑豈羨潘輿立身揚名逸豫寧慙伏憶江魚
入饌矜餉鮓之爲艱竹笋迎船惜鰲焦之爲陋
豈非一日之養可薄三公而八座之榮堪怡兩
齒期願難老永欣蕙草韻芬祚履彌新佇看蓀

初集
卷之三
枝鬱郁殆將抱貞通德稱人世之蓬瀛布澤貽
芳頌北堂之金母卽西湖三柳留爲異日棠陰
而方壺七華堪證延年苓液愚雖不文未能布
宣母儀要亦樂觀盛事者也因授簡客卿登諸
綵幄

大中丞東翁高公六秩壽叙

代

今上御寓四十襖握石椎懷神珠南極獻圖五
曜霄暎朝野嵩呼萬壽而耆碩總樞中外師師

多積勲累伐之臣學人士咸稱周家邳隆爲古
今久安長治之冠雖風雅善爲鼓吹乎亦必有
鷹揚之尚父壯猷之方叔與金錫圭璧之武公
後先照耀始足以點綴休明翼贊悠遠之業至
魯號姬胄猶知以三壽作朋如岡如陵爲美爲
規也明明天子抑以壽佐爲四友乎維我淄川
東翁高公適以是歲登六秩壽二月十六日爲
攬揆之辰兩浙士庶歡呼稱慶梅香象華各就

方隅祝長生焉而運長郡佐以下函書長安乞
言爲南山之頌蓋不佞夙有窺於公而知公之
經緯宏膺受固也兩浙襟帶江海泉貨灌輸內
則赤子啼號斥鹵沮洳水火豐儉極備極無以
至澤官之秀金門之彥靡不望恩焉探丸胠篋
國門之魁白晝橫行摩牙吮血以至穎水之俠
季倫之雄靡不畏威焉藩臬長而下及游徼長
史纍纍若若將領材官選鋒屯伍操螯弧佩茗

穎前茅慮無中權後勁奉約束惟謹而其外則
鬻首朱題鼉宮蛟宅丰稜之所趨嚮法令之所
防護撫禦之所緩急又靡一不係持籌也乃公
甫蒞浙也民之呼庚癸者咸登諸衽席歌樂國
矣旣條便宜悉誠令析利病諏纖隱愛小民如
蒔幼苗懲奸宄如鋤稂莠獎循良如仁麟之護
蠹蟲糾貪墨如鷹鷂之逐鳥雀蓋朞年而政成
今且駸駸乎象指而化也士無譁海不波鉦鼓

旌旄氣張而志歛外疆之厄於風者禮遣續食
不掩爲王俘益足爲獻琛者勸而廣厲文學建
塔濟河興省城百世之利公之擘畫豈淺淺日
計者哉大明律令關人命呼吸公手自詮次著
爲令甲于公不寃隱德且世不朽矣當兩湖告

成

天子賜白金文綺璽書加勞且以蘭臺獨坐且
夕待公攝三事冠百僚文武爲憲且自今始兩

浙安得久有公而我公岡陵山阜之福平格正
自今始也不佞每觀大臣福祿壽考之隆與功
名爵位之盛皆若有天培非人力可擬者如郭
汾陽裴令公俱享有全禧富鄭公八十書屏猶
嚴守口文潞公九十尚能動夷人指羨當其身
都將相助勦剗割出之裕如忠愨爲經才猷爲
緯而精氣悅康神理綿茂足以用之不勤書曰
天惟純佑命則商實茲豈非難老永錫以禪萬

年天子之股肱心膂者哉公之年與公之業俱
如日方升而攄丹抱蓋訐謨遠略廓乎大臣之
度以其填撫我浙者佐廟堂追文富芳躅榮被
社稷實未艾也二三大夫幸以是言晉

王太母項老夫人八十壽頌

今上御曆二十六禩王太母項老夫人寔維八
秩壽夫人名宗淑媛華胄蘭儀早叶坤占埒謝
娥於玉樹夙閑內訓儷辛女於金閨鳳卜施其

松蘿鸞匹宜乎蘋藻雍容琴瑟襟佩以相芳聲
勞勩丸熊斷機以成令器孟案匪脆嫺睦瞻其
雅規共舟孔堅日月鑒其凜志永蘂之貞愈篤
蓀蕙之瑞用蕃申錫自天難老維福康寧是徵
保艾耄耄以臻期頤三秋兆乎千秋金母誕于
金季茲維九月二十有九正其懸悅之辰也菊
英甫燦彭祖餐以永年頴粟初和南山挹以介
壽安期薦如拳之棗曼倩羞琪實之桃槐眉白

雲之歌瑤池進竿鳥爪碧瓊之液鳳輦呈漿珠
履之客彬彬竹馬之嬰栩栩稱觴佐日進頌如
雲朱生廷綬托於末光特徵片言將之首宰夫
黃流玉瓚施報有常羔羊兕觥祝祈伊重純嘏
要諸燕喜多祜藉以無彊夫人德燦金規行高
玉琢鷄鳴垂範示不匱之在勤鳴鳩訓慈明主
一之爲敬筦籥授督泮泲貽孫方舟泳游牙籌
遜其主計苦甘竒羨舉費需其好施允矣京陵

之母規展也弁丘之遐筭至若箕裘世茂禮樂
家承麟趾振振螽斯蟄蟄扶搖九萬南溟之羽
翼已成搏擊三千天池之頭角漸露鴛班映翠
佇看萊彩青雲鳳詔凝丹隨見翟冠白髮如川
方至似日初恒華封未足以展私婺宿益光於
上閱婆娑幼艾保護玉房刺肥異糗侍食悉文
藻之彥常珍列簋搏黍皆岐嶷之英卽恬養多
方未足以煩熊鳥長生受訣要非假乎菖苓平

格之祉特隆百福之徵駢集休乎嘉哉郁兮尚
矣謹次其辭以爲堂上之侑

壽見九杜老年伯七秩華誕序

萬曆歲在昭陽赤奮若律中蕤賓於月爲臯可
以居高明可以處臺榭雷圉至止廣樂斯張迨
羞菽翰迨吹笙竽時唯我年伯見九杜翁攬揆
之辰先生蟬延慶都龍馴累葉道言莊是儒行
魯餘香戢壻圖博至精於地肺甜間晨曜踵六

樸乎玄蹤而且函風雅叶苞符襲征南之武庫
象珪璋傲弦韋渾江夏之琮璜孝友性成里推
務伯慈仁衷植鄉號元方質參玉而無分相比
金而有裕國爵讓貴德門之望逾高寒素好施
青爨之烟若熾是以天光下燭闡于懸少微之
一星地氣上騰輪菌發祥雲之五色惟茲朱夏
瑞繞雕甍夷猶三泖之賓鬱菁葱乎茂樹喻欽
雙龍之浦洵機組乎文章飛鴻翔卉點青桂以

成陰抽紫弱荷漾綠池而泛碧爰張蕙薄爰敞
芳延凍酌清醑冰漿蠶勺三神六洲之侶卹削
以先登容成姑射之僊綵繅而後驚聃耳稅駕
偓佺揚觶雙成垂手飛瓊發聲憂織露激清商
載歌且颺曰隰有杜兮樹南山川方至兮日未
央君偕老兮榆霞裳又歌曰庭有芝兮祀有蘭
芳晻曖兮覆嶺岫望不極兮離哉翻歌闕則有
丸巖之鳥蘇羅而來鳴千歲之鹿啣芝而彳亍

茂苑疏延瑤圃紛其瓊實落花覆沼太液標其
夜舒趨庭菜絲纏膝孫枝結丹桂以鬱紆渥矣
丹青之署翳青松而偃蓋燁哉青冥之期則有
年宓子鯨跂雲間而雀躍望日下以嚶鳴偕我
同盟辟席而進稱曰方今道介由真運逢大當
記年之牒儲抽國老之儀方肅祖而割跪而醑
奉几進杖問道乞言惟翁其良旣老而傳載色
而康然後逍遙乎霏霞挹軒乎鴻龐赤鳥紀瑞

褚馬繼纏於都休哉杜父南陽江魚入饌竹笋
迎船委蛇簪紱赫耀鸞章簡要清通樂觀令胤
之經緯鳳池鶴翥喜偕賢姓以翱翔春秋百二
逸豫無疆維我二三兄弟後先雁行以奏霞觴
而先生幸爲加爵

涵虛沈老年伯七秩榮壽叙

當已酉順天之役武林雋者三人而潤蒼沈君
以明經高等騰驤霄漢不佞謬叨同籍握手長

安甚驩尋歸拜沈君尊人涵虛公堂上公豐下
康莊修幹偉度望而知爲富壽康寧今之人瑞
也公蚤歲邁家難挺身崛起以計研之策三致
千金修業而息之隨散諸戚鄰之貧者暮夜緩
急呼吸必應業日益昌布德日益遠雕栢繡楫
珉膏瑤耀懸藜結綠不蹕而集而公退然若不
勝間里識不識咸稱公寬仁長者也生平惟訓
子最隆羔雁緹績延有道而進之書聲徹戶外

今長公鵬奮天池尋且奏南宮履粉署矣次公
翺翔北雍每試必占前茅儼然追風逸足而諸
孫玉樹亭亭皆丹青之價青冥之期也公之所
豐施豈有艾哉今年十月廿三日登七十攬揆
之辰庭下列安期棗舅倩桃方平瓜芝蘭之語
淵嶽之詞爭以爲公祝而同籍二三兄弟屬一
言以當稱觴之侑請以易爲公頌三百八十六
爻貞悔具備而獨大有卦享有全禧自天佑之

吉無不利爲上下協應順天純命之基利而必
本於厥孚交如信以發志如公創偉業聚衆媿
子孫福澤世間人倫之樂與厚實榮名人之所
希覲而不得者公安享有餘居有鄭白平泉之
饒嗣多岱淵延津之寶鸞章次第且至公矍
鑠精采行不瀕鳩食無祝噎他日鶴氅酡顏高
揖冠紳間期願難老陶然飲滿婆娑徜徉弄雛
五彩逸筵凡奏宮商割上官供膳郡大夫修三

老五更之禮延公祭酒執爵執醬武林艷稱爲
熙朝盛事不佞與二三兄弟執玉犖進南山之
章彰發志之效公其以斯言爲券矣

岡陵啗壽待封吳母程太夫人七秩叙

嚮余從馮開之湯義仍兩先生獲聞新安吳伯
實仲虛兩君子恂恂孝友多長者行竊心儀之
旣乃交於元益符遠而符遠之居武林較元益
爲久則交更洽也符遠醇厚好文推誠忼慷有

父風宗族交游咸稱伯實有子而因習知其母
程太夫人亦偉然丈夫行矣太夫人爲望南公
愛女婉嫕端肅夙以識勝望南公之雲間收責
而盜燬其廬太夫人方幼曲以義命爲公解及
于歸不以椎髻而以眉案歡而有禮甘牕事龍
泉公姑黃孺人恭順曲中夜分警萑苻家人爭
匿輜重太夫人急護兩尊人曰此外俱長物耳
家計出入務節嗇而辛苦作勞一以身爲諸婦

初集 卷之三 四十三
鵠至捐羸拯乏緩急必應伯實性所樂施而太夫人佐德市義尤不願有其名也視一姊四姑情文均到而尤憐孺居者待庶子不殊已出撫臧獲輩有恩頃年禮佛甚虔獨不喜逐尼媪赴香鐙梵磬稱優婆夷生平課子隆師傅聞有四方賢豪名雋必令周旋無失隊有言關於道德仁義欣欣色喜亟與其成名今符遠僅以中翰起家而孫枝繁茂施未艾矣甲寅九月太夫人

登七秩壽諸與符遠游者謀爲壽觴侑純錦蟻珠無弗走也而符遠不願曰願得賢者之一言足以娛吾母矣夫剛陵以詠高厚也川至以遡盛長也萱以象德也芝蘭以肖庭芳也凝仁絢道則朱圃耀祥達順宜慈則玉英呈瑞不佞之言未必重而藉此數者以爲重也因命雲間吳子繪畫而弁其首幸符遠爲進介壽之觴

錢配劉夫人六秩壽言

世之以縹組獻者必曰雲漢之章鮫宮之織移
珍西岳賁藻南濱諸玩讓熒焉而洛誦之孫直
以爲春箕秋籜曰吾嗽芳六藝纂繡百家單詞
一字炳於丹青而他何以易此由是文章之道
尊轉相倣慕而珥彤載德縹帙表徽雖有拱璧
以先駟馬不如坐進此道錢君徵伯所爲乞言
壽母意深遠矣徵伯幼負瑋資遍叅名雋及鼓
篋孫業日月緝熙學而牛毫成而麟角詎云製

錦漸就七襄曾大父膺貢不仕將竦以拓大其
門乎大父通湖公產漸圯矣父養初公奮志爲
儒計不足以充甘旨則脫身游吳而劉夫人爲
武德將軍醴泉公中女儉勤恭孝自天性尤善
心計閫以內井整如朝典卽持籌畫百里外事
無不竒中家用是烝烝有起色養初公幼失恃
繼母沈嚴刻多恚少喜子婦惴惴上七箸不敢
仰視退或偶坐疑有後言劉夫人婉嫵以從卒

無勃谿游子出爲治裝歸必謁母堂上勞苦畢
輒促行曰非不念霜櫛風簑思媚有依不敢忘
敬仲之饁也養初公時寄力珍夫人益市甘鮮
以取給於簪奩而沈未究所從來得無私有橐
乎疾走發鑰啓櫝嫁時衣質且盡矣始愧悔稱
賢婦善事我至彌留願得賢子婦善事爾爲我
報德也噫積誠之動如是哉養初公敦隆儒者
淹雅有致人無不矐而就之其赴人之急甘蹈

湯火居華亭多游賢豪長者縉紳先生自貧約
時與訂交久而不渝形神互相洽至今一日也
三致千金廉也五之隨聚隨散不任爲樸滿三
黨之親與僑札之好及一技一能之人待以舉
火者數百千指人人望養初公如長城如十重
鐵步障而劉夫人佐之行義纖細必鈞客至命
觴珍錯咄嗟辦公嘗護一友之被繫者後以逋
坐堂上爭譙呵夫人慰之曰君以交受譴不又

有分譴之交在乎卒得其人曲爲解曾遇苧城
祝融之難夫婦叩於庭曰某無德以抹青第何
以償收責者火遽滅養初公當衰落之後手自
拮据堂構隆茂生平無錙銖負人乃大爲人所
負樂施不倦旣成徵伯爲儒修業而息人以爲
養初公德儷其才而劉夫人之協助渥矣徵伯
離經稟采一以爲吉光一以爲復陶一以爲機
中之織玄黃有章黻黼上國養初公與劉夫人

之藻績寧有量哉宜乎徵伯之辭縹組而乞英
詞也丙辰十一月十三登六秩壽遠近稱觴者
屢相接夫人子壻沈毅詒余甥也徵余言以佐
徵伯之請而不佞樂爲敷芬如此煌煌天孫彩
鬪如雲其式臨之矣

觀察使帖翁王老公祖五秩榮壽叙
方今紫寓交龢昌衢敦序蕪城恢耀神駿上襄
穆穆祗祗之佐充鷺分虎宣敷盛理而觀察爲

特憲之宗兩浙據東南之會神人共矚遐邇快
瞻維我婁東岵雲王公誕膺寵任覃施懋德浙
之士若民頌聲蔽遠撫塵擊壤則戴縑垂纓之
彥相與稱述曰操濕非嚴而公仁心爲質民不
忍欺鉤筭非察而公洞燭覆盆無煩捫斷蓋公
之倜儻神明英敏特達出自天授而金錫圭璧
體備媿該故望見顏色者正如晴旭朝燦秋月
夜澄夏披涼風冬負煖日人人以爲親已而城

府無鬲重門洞開以至疑讞鉅務倉卒劇繁明
鏡不疲妍媸自照行雲流水隨應隨消豈非漢
吏之上諳分陝之元碩乎而公函二酉苞五車
著作直躋兩京風雅兼標百氏海內詞壇爭推
主鬯日新富有駸駸未艾文章經濟公兩擅其
勝而浙之士若民實被宇下有厚幸焉公以弱
冠明經壬辰通籍今且階三品班景洪勲德化
溥洽矣而齒甫稱艾六月十七爲攬揆之辰浙

之父老群子弟咸欣欣爲加額曰渥哉公之隆
施吾浙也公筮仕爲水部郎卽奉命權關商民
沐濊恩建祠在靈鷲月桂峰與文昌並峙且及
百世旣分篆兵道吾杭有嘉樹焉侯旬侔於召
伯尋陟總憲而黍苗之膏沃壤霑足矣杭俗樸
醇守法公已熟悉其情僞而民之寃者望申疾
痛者望哺懷竒抱異者望爲甄拔亦不煩詞畢
而璣篋取攜無叩不遂天生瑋材必有一方之

寄造一方之福而我浙獨有厚幸又若畸厚於
杭公春秋方盛功用聿興繇方伯蒞大中丞吾
浙得久有公畸厚未艾歟雖然此猶未足爲公
頌也 皇明文人之長昔爲濟南弇州今爲雲
杜而公所著書跨有衆美業已籤標鄴架聲重
鷄林埒之三公正相伯仲乃後先俱觀察吾浙
長庚玉英之照占星者必詫爲竒然三公爵位
又獨弇州登八座公翼亮崇本貞度端揆黑頭

作尚書指計可竦官保上秩皆公所自有不足
為頌而令宇內考吾浙觀察之盛咸稱齊楚二
李婁江二王以榮施無窮則不得不私為吾浙
幸矣

兆翁戴司馬壽章

高皇帝豐鎬之都山川紆鬱氣厚而靈蟠南華
真人發千古琅函墨花至今影映維我兆翁戴
老公祖協瑞毓奇衆燉具備蓋不佞鯨沐教日

久而信公有天授非尋常可窺也公心如皎雪
氣若丹虹待人無小大推誠布赤直剖肝膽無
不被春風中而識鑒精核擘畫嚴密世方葛藤
公獨游刃衆方勞攘公獨鎮靜以至其材諳之
敏給精神之矯捷真所謂手揮五絃耳節鳴鼓
大叩大應急投急應此豈彳亍所能與萬一哉
公初宰禹杭保嬰鋤強興利剔敝萬姓衽席兌
糧滌五花夙蠹而軍民兩利濬河衍六橋勝蹟

而蓄泄咸宜每爲民省數百金所全活甚夥而
公潔已不染胡威倪寬不是過也及擢郡司馬
嚴明仁恕相理當機吏民畏若神明懷如保傅
干楸之警躬往校察月析霜鈴子夜必遍沿江
萬灶素苦三冬多虞而今萑苻不喧四郊安寢
者誰之賜歟公實經濟大用之才而我杭偏受
其賜浙有厚幸矣公以茲月廿三日爲攬揆之
辰不佞與二三友執繪圖稱壽而僭爲颺言蓋

浙之渥被覆露者獨先杭而杭之夙沐提誨者
則不佞二三子尤宏也敬歌萬年之章曰鹿鳴
君子邦家之基嘉惠武林黍膏麥岐懋績孔昭
保佑命之君子萬年壽考維祺再歌棠蔭之章
曰懷於有德哺孩如繫冬煥春熙湛恩下濟用
汲豐施嶷然卓異永錫我浙甘棠蔽芾歌初成
二三子欣授副墨而乞公爲加爵

司理禹門毛公祖壽章

禹門毛公弱冠登壇爲菽苑樹幟杭六典之崇
與辨九籍之至言及掄魁南宮海內珍其文以
爲霞彩縱橫星飛電掣壇坫之長避席恐後旣
奉命佐理武林嚴明公允上下欽懾頃滿三載
績報最天子嘉乃績壘書褒美封兩尊人如其
官兩尊人春秋方富公亦以丁巳臯月六日屆
三秩誕辰而愚不佞以爲卮詞未足壽公也公
自采齊鼓篋振翮天達經綸一班遍逮兩浙今

且三年有成矣入則修萊綵之歡出則播羔純
之譽上則明主葵其丹赤下則士庶佩其神明
如入萬花谷中錦繡爛熳卿雲麗旭交暎並宣
世之離經辨志者籲天莫遂而公備有之卽有
所陳說俱公之餘至云壽二親壽萬民壽社稷
以壽一身效岡陵之祝而公視爲老生語正如
筵几之上方列四酎九醴珠連波汎之香旗彈
徵扣宮五味皆應而復進河醪爲縹碧能適日

乎然愚竊核公之所以理浙者而知壽公者不
煩贅詞也公天才雋爽神理瑩徹遇珪成圓紆
絲作罽兩造俱陳偕來者衆方一顧張瞬轉脉
動想芽而公已片語剖破膚粟膽裂民之不忍
欺與不敢欺競獻肝膈而作奸犯科誰不化爲
善良也覆盆有冤曲爲昭雪狂狴有蜮直爲芟
除活處子於黃臺擊封狐於白日巨璫虎翼次
第寘之法而昏翳若掃葺城築倉緩急調其宜

而雉堞聿新公之所可紀者磬竹未易書而公
不自有也日省月試進弟子員評隲高下儒林
爭相浣濯以應辟珥之詔文武場悉公鑑定首
諸士直指使者所在倚公如左右手藩臬諸長
每事借箸公從容暇裕不煩指撝咸中肯綮而
歛躬居靜淵泓不測公之設施正從此始可大
可久直未艾矣百昌之榮惟桃李爲最當春而
花當夏而實繁英芳葢艷穠超倫而員丘玄雲

之李華林石城之桃餌之皆可長生久視與安
期偓佺同壽蓋玉衡五木之精原出天授群卉
所不敢望如公銓曹臺省旦夕可至經緯宇宙
師保所自杼何足爲公祈而南山之歌萬壽必
稱樂只則公之所自爲壽與所爲壽公者藉公
門桃李已足揚詡宏庥更不煩借凌霜之勁栢
貫石之豫章徒瀆聽睹矣公幸勿以老生迂之

台嶽畱賀屏岡徐翁雙壽榮封序

人之言性情者必曰中和此不獨宋儒語也然
中屬未發屬大本一以含藏爲主而和云已發
則達而透露畢徹矣和者不偏而未嘗不偏如
不偏於喜而必以怒濟之不偏於怒而必以喜
調之可謂和乎非中不能含非偏不能透天地
網緼爲含而萬物怒生勾萌甲折者偏之極而
和始奏功有功則透宇宙之經綸掀揭悉呈於
是矣愚自乙未西安徐兩卿來游從此無歲不

朝夕戊戌乃得交封公屏岡翁而此心不勝愛敬慕讚之也屏翁才具廓大而毫不露圭稜相見藹然喜形於面無少長必款洽族卽有詬誶而翁不競加之者或難堪而翁寂如真誠篤厚甘讓人前翁蓋一意含藏而光明錦績俱孕釀於中者也至吾子卿而氣堪食虎志在鞭霆儻竒偉之操一試於海上而去後思再試於江夏而輿誦遍秋霜冬雪茹蘖飲冰子卿蓋備用

其文人之苦心而透於儒偏用其法吏之定斷而透於官頃奏最褒美封及堂上兩尊人而屏翁與鄭太夫人神明方茂福履正新不有屏翁之含無子卿之透亦惟光華煥爛勲業漸著而始知含之爲美大也子卿已擢冬曹泰階八座俱用透之地而屏翁偕老榮壽以含毓厚集其精純不佞樂觀盛事從茲始矣

長源畱賀濟泉徐老仁翁八十榮誕叙

不佞喜從養生家詢延年益筭之道有以成語
示者曰母勞爾形母搖爾精外身身存遺歡樂
足此太上鍊息之旨而世誤以爲逍遙閑玩一
切置其心於不用斯爲長生要訣不佞竊以爲
非然也夫流水不腐戶樞不朽心者神明之堂
戶何息不與晝夜呼吸相應而必閑曠排空以
邀上壽豈非迂懶自放者之托以藏拙者哉黃
庭玉樞抱朴陰符其書具在所稱攝心調性葆

真練炁與生物相吹之息無刻不關橐籥微乎
微乎丹元絳宮握樞司令百骸俱暢而大椿之
日月長矣憶戊戌游太末獲交濟泉徐翁端厚
長者禮恭視下見之不敢以狎容進而鉅細行
事無不罄用其心者翁持籌比計然而發粟輸
金助公家賑荒歲以百計所活人無限左支右
訕朝耕暮春仰掇俯拾春筐冬廩翁蓋纖微必
到而不經其心翁亦不自己人亦知翁必不已

也翁初艱於子精心求秘方果連得佳兒長君
積卿雋爽有令稱而少子賢孫皆英英露頭角
矣今年八秩壽神理朗徹步履輕快無異少壯
時親知咸相忭慶以爲期願難老視子若孫扶
搖九萬封章非遠不佞夙沐公欵洽以良方惠
我聞不佞舉兩子而喜積卿殷殷弟子之誼獨
隆不佞蓋心服翁善用其神明以游於萬物而
精烝固綿綿若存長源萬斛多於海屋之籌可

預券矣因乞張太常繪圖而申以一言積卿其
爲我進南山之酒

賀史方伯六秩奏績序

代

溧陽史公繇射策高第讀中秘書尋備諫垣贊
左右秩宗簪筆侍 帷幄旣佩魚建燾旬宣蜀
閩豫章之間所至茂昭榮問已擢浙藩左方伯
具六載治績再上主計者魏勛琦烈遠近砥屬
含譽佐明燦映 黼座壘書加勞當有特進殊

初集 卷之三 五十一
寵以駁偉碩給輅旦夕至矣而武林郡長龔佐
邑宰諸君亟圖所爲徵公懋德者謀之惇史氏
某微諸君之請亦願有所效於公也蓋官制所
稱舜以五長綏四國周以十聯率諸侯今之監
司亦其遺意云而藩長提衡握鏡總序庶翼有
古方岳之尊而俯登民瘼則甚親有前代轉運
之勞而久任觀成則甚逸要以道先帥物政貴
養民體詳居簡毗崇樹軌厥有攸尚歟浙當衝

會疲窳難堪唐李長源李德裕言之確矣乃聞
公自下車及今入肅紀綱出撫疾苦虛衷調脈
而煦育之如一日浙東西數千里有春臺之娛
無秋荼之苦大中丞繡斧使者治粟視讞後先
旁午俱倚重公所條便宜滌煩蠲苛造福甚鉅
而接郡邑諸長佐以禮休風偃物淳化玄通無
不欽典摹而登熙域也軍興日增月益脂膏幾
何什九以供大盈而什一未果邊陲之腹官私

告匱公擘畫井飭䟽滯剔蠹投牒者重趼而求
領薄者宿春而返儲課鹽牧萬里畢照如鼓應
桴如宮叶商輸運輓轡而公之覆露遠矣兩屆
賓興殫計豐腆士之歌鹿鳴者爭拜貺焉而廣
厲所及僑彥風隨探海出珠舉網羅鳳林無被
服山無韋帶斌斌稱二酉焉又以其暇新道宮
葺勝槩雕栢翠蓋賁相望於明聖瑞石諸峰而
掩骹埋骼澤及泉臺又不特潁川王立專美異
代也六載以來我浙之士若民被公宇下者寧
更僕可竟哉

今上以麟定誕祥恩膏溥洽黃髮鼓缶稚子歡
歌綴三后之頽綱補五常之漏日真所謂天割
祥符地命靈契內外臣工咸有榮施而 詔旨
有藩長兩考績者徵佐卿筦公奏最首合明典
葱珩赤芾榮及祖先儲將熙載端揆發宣醇懿
兩浙必不能久有公雖獻九戩之章無有爲士

若民地者且公以累世勛闕昭茲繩武卽韋業
薦興崔經世茂咸不足爲公埒而翼贊八紘覃
賜九垓舍公又誰屬也敬以爲公徵

賀右方伯本如吳公晉擢左轄序

代

今上御寓久苞元鑒德鴻徹紹禧履時以象天
養才以任地而十三方岳之長則所爲旬宣砥
屬經埜敷庸屹然山河之鎮者也兩浙稱首藩
襟帶江海度支灌輸爲神京縈衛視他省綦重
頃桐城本如吳公實被

新命繇右轄晉左方伯盖吳公署篆及朞如亞
旅操家督而今則運璣振領爲山川秉圭煥乎
釐飭丕緒而益底於有成浙東西千里幅幘快
瞻霞翥其在斯矣郡侯王公運長柯公各率其
屬以及邑令楊君樊君例宜謁賀函書乞言以
章彩幄不佞博稔公治行覩聞最洽而識公之
展局宏凝基厚也夫湛盧之不以擊鮮也蒲穀

初集 卷之三 五十九
之不以燕覲也駭犀震靈之不以修贄也珠槃
玉敦之不以仙舞也用各有宜噐各有適持其
大者自不屑以小見也故鉅細緩急調劑合節
而經濟出焉其組練訓習然歟亦若性自有之
矣方公以大儀叅浙憲分守上游高褰襜帷分
膏澍露登疾苦究沉寃民有不得上聞者如椽
焚拯溺亟爲漭白而拔薤鋤莠未嘗少刑部以
內人人如投醪挾纊焉其法立而惠益以溥者

乎逮擢觀察則純任法矣乃秋霜之冽與冬日
之燠每相爲施而不相爲貸吏益嫻於矜修民
愈篤於禮義下之人肅然習上之不可欺而畏
志歛度奸宄銷亡教章而風醇公之有造於浙
豈細哉乃不佞聞公之移右方伯視篆事也又
異矣清冲簡穆蓋盡韜其埋輪駕驂之可見者
而治以不煩鎮以無譁肅容坐堂上鹿僕僕樹
樛樛抱牘授牒朝至朝給夕至夕發兩浙游徼

之卒無峙棖排關之慮焉各郡邑徵解佐史因緣爲利所過需求作苦公一切報罷屆期察丞倅之廉而幹者持片牘挾以歸筦庫無知者所省歲數百緡而條析出納羸縮之宜蒐剔深淺明暗之弊極纖積幽如照乘夜光無所不屆歲所省又數百緡而公未嘗動聲色廣文告滋紛更也靜而不弛貞而不苛明通而不恃鉅筭渾涵而不骫三尺坦衷率真油油然怡怡然如紀

涓之養鷄如郢人之削堊如伯昏無人足垂千仞而色不怖德機內杜天和外融公何以臻此也性乎學乎則公之局宏而不以材譎見竒基厚而不以跬寸著績其所持者大豈以淺淺爲哉以故爲政三異而三協於體金錫圭璧其章相兼備者矣雖然公之被我兩浙者將十載不可謂不久而愚不佞所習於公者更有進也公博綜墳典篤學不怠嗜賢如渴遠近名宿見必

續綫不靳縑采焉而至所自給則喜十徵不御
羅綺甘蔬蕨不設難俎冥思朗照恬淡寡營脩
然若蒼松綠鶴之在卿霄素雲皎月之照丹崖
不自知爲

天子屏翰之臣約已善下無異儒生噫昔郭賀
召見南陽賜三公服段穎鼓吹連騎曲蓋蔽日
彼俱方牧之表表者尚未免此以公視之陋已
極矣忠武不云乎澹泊明志寧靜致遠公蓋嘗

佩服於斯歟抑何行之速肖也今日且總攬宣布
恢恢游刃其裕如者耳循此佐卿貳贊樞筦三
臺八座以大見者益不事小清靜寧壹之儀非
公何望哉郡大夫醮長以下倘以愚言非勦襲
文具者也曷以致公因扣公素所得力者安在
而惠教其精微幸甚

賀按察使淮南竇公晉擢右方伯序

代

金斗淮南竇公以經術大業起家庭評甫二載

初集
主試貴州所收多名彥尋轉秋官郎移佐司農
出守大郡有聲督學三楚薪樵之化久而彌振
既叅閩藩政擢浙江臬憲及碁銓臣議以右方
伯本如吳公移左以公晉右具疏請
上同日報可兩公生同鄉鄉會俱同籍今復同
官塤箎伯仲之誼如合一轍至動
聖主而綸宣覃被也不後期郁乎盛哉學人士
頌媿休明必期於虞周之業維時臯夔矢謨周

召布列位鈞德齊退則和衷進則讓功猶之以
龍興雲以律召呂此唱彼和金石相調大者以
協神人小者以徵率舞公之贊猷佐勲與吳公
雍穆師濟復修臯夔周召之治此其小試一班
者也我浙之被宇下者覆露渥矣不佞承乏陪
京久於浙爲枌榆於畿內爲豐芑以耳目所及
者指計之而知公之有斯擢也備三善焉當公
之初蒞浙也張子高之發伏禁奸翟子威之搏

擊疆禦吳隱之之軟水不染巴祇之十日不炊
先聲所至民已灑然易容應志矣公早夜勤敏
在鑿必割菟摘回邪如御奔馬敦本息華幽枉
必達而水蘖比清薑桂埒介吏信民懷閭右歛
迹庶幾於五兩不砥三革不累之遺風歟射鵬
穿揚期於貫的追風逐電期於濟用公之令行
禁止化已成矣岌以善息當使神君玄象久而
見思將無黃髮擊壤小兒撫塵公之榮施豈有

既乎而望綦隆矣臬主刑名藩主錢穀其勞逸
殊也公又爲佐當夫水火未調冰霜正凜燒不
暇拂濡不給旋公之澄清寰宇自其夙心而今
或更番恬養之時歟非獨此也易不云乎二多
譽四多懼近臣守和仰跼俯躅公優游靜治四
國于蕃爲職易效而養綦茂矣國家令甲必親
民事而後爲三公牧伯縮帶疆土正所以鑒衡
長民者之善否而陳之銓宰者也從此則躋列

卿帥雄鎮經文緯武殫生平而次第布之右轄其津筏乎公所宏施尋且遍海內而位綦尊矣公以端凝之度肅已貞度與本如吳公左提右挈一德一心委蛇羔裘而儲以培臯夔周召之業孰謂作吏非學哉獨念不佞素有嫠緯之恤每每向人稱述之而慘然不自持也當今海內多故西北水旱飛蝗之災殆無噍類兩浙雖偏隅實三輔之腹心也貢賦所出甲於三吳選鋒

修戟素號英特滋息其元氣而厚豐殖之以備緩急梁肉刀圭上之人必善爲調劑而公與吳公之覆露我浙者黍苗陰膏穰穰無疆其永孚於休乎郡侯王公運長柯公率其屬以及邑侯樊君楊君皆沐公之教而覆露我浙者也函書乞言爲公輔矢先驅之導不佞願安承教籍以發覆坦衷率語質而非史或亦所言公公言之乎則我公之不可干以私久矣

送司理光六胡公榮膺新召序

代

國家選舉考課之法兼採前代有漢之核而無其峭深有宋之贍而去其重複至所稱善以著其德行最以著其材術九等並剔則與唐媲美焉頃自輦下多積薪臺中多虛位主衡者循資序遷需次待對蓋獎拔異等以備蘭臺青瑣獻納都兪之佐而司理光六胡公以儀曹赴徵車遠近聞者咸曰秩宗典三禮欽五常宣文明泰

和之業公餘靈足辦之矣而未足以展公用也某承乏錢塘獲事公三載所被服最渥亦以爲公之用其自此始乎歐冶之鑄劍也赤堇採錫若耶出銅剗爲青冥淬以紫潁太乙守爐茗鋒如雪下者宵練每見影而不見光而龍吟虎吼擊斷萬里神氣所含列宿環護體具自遠公之以經術顯也擁書抱籍稟采豐華業登董賈之幃契淵雲之妙矣而發爲治行大槩皆古人之

心漢吏之氣自十一郡車幡所及叅贊繡斧肅
而有方玉質冰操肌理清寂以至上承監司俯
揖屬吏閭閻侃侃悉心披愫益乎春溫四時皆
備其視篆佐公鏘鏘然墁篋之和而左右手之
相爲使也不貸法而多所平反民自無冤不徇
情而登枉推情下不忍欺不務爲鈛笏赫耀之
竒而執法梘斷毅然電決保善如蒔苗嫉惡如
刈莠憐才如蒸蘭鋤強如拔薤分別清濁如伶

倫審音季札觀樂無不洞中兩浙士庶神君與
慈父之聲交藉道路而公夷然不自有也率已
正物獨往專詣如是而已昔淳于生之解隱語
也於承上使下脂韋環聯之巧若已妙析機殼
而陳咸頭觸屏風終不願一聞教誥之語性旣
有極作用隨別戛戛乎難哉公之所樹立遠矣
唐臨之自署其考曰心如鍊石而尹思貞之受
眷於睿宗者至稱剛不護闕清畏人知簡言易

初集
卷之三
從莊色難犯，隱高山景行。何必振古，以此揆公。豈相越也。公今且登星輅，騰丹翥矣。尋當參帷幄，司喉舌，整儀肅憲，清風穆如。有不茹柔不吐剛之山甫，而自足以舉德補袞，有視民不佻之嘉賓，而自足以則倣君子。海內喁喁，莫不想望丰采，以公爲楷模，而何啻兩浙政績已也。某賦質椎魯，無能備公鞭弭，而瞻依明德，久在宇下。詠以正始，檠以朱絃，如集如臨，是型是範。蓋受公之所覆露，而益諗公之體具遠也。湛盧日月之劍，佐王者則生芝，某以是爲公券，敬奏之，授綏之使矣。

仁和樊邑侯晉權秋曹叙

代

豫章致虛樊公，以射策高第，初試麗水。父母神明之頌，振於東西；浙主爵嘉其績，移蒞仁和。蓋以首邑要衝，用能宣敷，媿懿而厚錫，敝邑之黎老嬰孺也。政成俗恬，如游春臺，將終身焉而

新命誕及當受事爽鳩署以贊

天子勅罰導禴之治駕有期矣邑之鄉紳孝廉弟子員以至司鐸游徼史耆民各鱗次上牘大中丞藩臬長可數百人日擁車乞留仁和令卽不敢希借寇一年時正屆編審願藉令兩月之勞以樹十年之德所臚列公治行頗具中丞藩臬長咸報可爭爲書留公公堅辭驅車而出將取道歸里壽太公六十爲班衣舞而後入

朝受事通邑士若民乞留不得者益擁車溯江攀裾依戀不欲以道迂自阻也而諸孝廉祖帳江許謀數言爲侑不佞家食久所需茂宰雅化最悉而獨於公尤循環輾轉意若有會而未能以片語罄也則有進而稱公者曰公理繁治劇之才偉矣左方右員甲可乙否朝受夕讞而庭無滯牘焉更以其暇靖園扉矜圭竇惟斂給故生靜治而恢恢游刃無大軋之戒止也則又有

進而稱公者曰公羔羊素絲之節著矣日中之
市毫無以單紙取索者鮭蔬而上必平價與售
焉澹泊冲約處脂不潤蓋鬼神可鑒也則不佞
進而稱公曰能諳之與循良合也清操之與琦
軌合也此皆公之易見者也公有不欲人見而
無不可見者公之真心愛民也公甫下車唇疾
苦諷興革鋤姦哺嬰皆一誠爲質非飾名高者
歲嘗大稔議賑議蠲坐堂皇而叩九閭有立稿

耳公念此窶人子餒瘵之餘安能入城市戴星
而出便衣策馬蹠躪淖泥中役人擔錢米馬後
隨至隨賑病予藥亡予榭周行百餘里暮卽抵
蕭寺隨行饘粥取充饑足矣里中父老進牛酒
堅謝不受卽窮鄉孩稚咸依依膝下不知有邑
令尊也所全活數千衆猾胥無冒破殘弱無覆
盆非真心愛民者能堪此溪刻勞苦耶以故盡
邑之溝塍高下與民之豐瘠悲愉公一一指掌

若胡寬管新豐直可舐筆和墨而繪之爲圖者
也今去矣士與民安得不遮留爲編審計者累
數千百不止哉非直此也郡多火公馳至必先
身登垣扞圍踐更土著踴躍爭撲滅爲功因不
至爲害獄有疑必廉其居址陡然入窮巷庠室
細詢得情而始定案邑稱神君而公未嘗臆斷
自用也郡苦盜公昏夜每單騎環行廓外扶女
墻之惰者得盜魁寘之法而鉤黨始平夫鮮衣

珍饌擁傳作貴人易耳有如公不避勞不好逸
奮身力行不求人知者可多見哉此皆徇名所
難而真心自致者也公天才超絕文學自其天
性詩埒大曆文比兩京爲當今登壇主鬯者代
執牛耳雖薄書鞅掌而著作不廢兩峰明聖鳳
凰諸舊跡題詠幾遍頃諸孝廉議建塔濬湖而
公條議四款皆金石不朽之章也孰謂循吏不
善爲文文士不習爲吏哉夫玉韞山輝珠藏淵

潤水火燥濕各從其真惟真故桃李成蹊谷蘭
自芬非藉人言者如公真心爲政卽什襲何能
掩淇竹安能載耶則邑之士若民何以報之不
佞亦惟曰真心愛公百世勿諼耳已諸孝庶然
其言敬進授觴者而益以清風之詠隰桑之末
章蓋皆以心贈願公爲加爵

錢塘邑侯汾隅楊公考績序

每稽載籍循良之馳宏聲者卓子康純任慈而
宓治萬亮純任嚴而永康亦治獨西門豹之治
鄴先後異狀若以黎氓爲毀譽之證嘗試人主
用表明已志而澍恩旌信卒歸於一至若李果
之破妖膽陳公弼除緋衣老人而中牟三異古
今誇爲竒績夫政安有竒有竒非上理也仁恕
爲質佐以嚴明營理審機調其緩急而總以縈
衛元氣助宣化育親民之要於茲爲烈則錢塘
汾隅楊公信哉嗣恭之高標而端貳之瑋軸矣

公蚤歲蜚英海上博士家誦其文埒於木難火
齊旣奏捷南宮而湛廬之新發於劍也追風之
初歷於康莊也姚江實首惠之甫踰兩朞德溥
化光臺使以其名達上移令錢塘錢塘視姚
繁均也而衝劇十倍矣旦晚坐堂皇程弊撫痾
夏予蔭而冬予日療枵以哺糜而給饜以鼎丞
神明御之耳朔望分至宵馳於臺長藩憲而暮
於輜軒之客屨也視事幾何而牘如飛鏃之集

誰不釋本輟末以就庭造者浸假而付之上下
手啣一札以出嗟嗟信信飛而擇肉窶人何由
叫閤而覆盆何由借照哉公天性警敏剴割百
鍊夙興夜寐訊斷如電發剖決如風解鋤奸如
去莠保嬰如蒔苗而幽蔀與滌無所不窺如斗
杓密運百昌俱在鼓鑄之中旣得其情以恩濟
法蓋梧丘不啼而化國有詠矣胥曹乘叢而飽
辰而裋褐酉而瓊瑜側冠睨視氣勢易張公自

片楮單言咸手自肩鑰猾胥末由嚙隙而中也
鷄犬桑麻嘻嘻鼓缶罔有假尺一以號於鄉閭
者至於秉量持衡而赴公府之徵不爽蟲首民
之歸市豈顧問哉徭繙給發刻期無後代耕之
繇踐更之隸歌有年焉則公之治錢唐如治姚
江鼓宮宮應鼓商商應淵淵乎燠篋之遞叶和
鸞節奏之靜以愉而公特出其餘靈從容命中
而已兩邑俱尚文禮樂詩書之奧區惟公所廣

厲而公藹然春融延士大夫有體課子弟行有
文有情剪拂於天閑而洄潑於睢渙姚江之歌
鹿鳴者多公所拔白眉也錢唐且駸駸向風而
舞矣抑何公之順宣無滯而民與士之徧爲德
也豈非仁恕爲基而嚴明益恣者乎頃三載秩
滿合姚江與錢唐之治狀而升之主爵者以上
對大庭銅章異等金紫章服錫有期矣郡中
諸孝廉就不佞而預爲券曰楊公之約已潔廉

也釜中之魚齋前之莧晏如也姑臧之膏罔潤也平允而明恕也鈿筩之機智不設而深澗之游禽無逸也愷悌而樂胥也輿臺笑短後之服而負墻多于邁之彥也穉齒之呼慈父也黃髮之頌神君也氣宇英燦如赤城之霞而神君暎射比卿霄之靄也是當入清通之署而卓魯諸人相爲鴈行者也周官六計寧有最於此者乎則不佞振襟起曰諸君子亦見泰山之雲膚寸而合不崇朝遍天下二邑公之膚寸也殷而豐隆爲甘爲澍爲彌天之瑞以覆九垓而後知雲之功用未易測矣知公宰二邑卽知公宰天下諸君之言贍而有章其于載籍所列共耀千秋何不可也

喬古崗父母仁和考績序

雲間喬君求先生樹幟詞壇爲風雅主粵海內業詩者爭奉其片羽一枝以爲祥鸞瑤蓋比於

邾曹受約束惟謹及奏南宮初試爲仁和令而以愷悌之心執平直之法有以武健嚴酷見長者而曰吾不能有以鈛笮訶察露竒者而曰吾不屑非但性所不能念所不屑而曰原無事此爲也弊之所生不求其減法之所止不求其多俗有當仍情有當恕善善惡惡不因怒而隊諸淵不因喜而加諸膝行所無事聽其自然而我無心焉坐堂皇數百人米狐沙蠅互爲豐蔀而

洞然燭之若上池之照垣一方也頃視兩篆庭下集千人侯撝指而泠然對之若空山之花開水流也三年以來所存活億萬生靈於和平安靜之中者何可測量而漢所稱悃悞之吏日不足月有餘造福豈淺鮮耶愚嘗怪以魯恭令中牟純任德化而不免袁安之疑遣椽訶視倘椽非肥親之賢安能譽三異於童子螟雉設無三異恭終不得爲循良耶乃知有竒政非上政也

有實心卽有實政仁人之勝法吏利且及於黎
民且及於已之子孫而先生諸郎君俱丹霄上
選韋經桓學效也明覩矣雖然先生所爲惠我
邑者非特螟稚童子已也邑稱衝鉅里役十年
一定先生初下車未一月卽值編審順民之便
稍爲更訂浹旬而罷靜聽無譁尋遇校士所拔
寒屋珪璋之彥稱冰鑑焉比日有課月有稽以
文謁者朝進夕發丹鉛不爽又何治之暇也東

關塘路傾圯旱澇俱爲民災先生首發百餘金
爲倡築城數百年之利今之興利除害者方未
艾也三異足爲埒耶而先生手不釋舉子業及
詩賦文詞批選盈几曰此吾所習也化國之日
舒以長其謂先生乎今考最屆期矣銓衡臺省
皆先生所自致特其醇衷古質澹遠冲夷日在
煩囂而恂恂儒素超然塵埃之外風範自別何
可無稱述之者不佞蹇拙無文正欲以朴語稱

先生而不及世之諛詞當事或有採焉

大中丞石閻劉公榮滿序

代

國朝聖明代御自內及外在官惟良內統宅揆
外統中丞御史自昔中丞殿中掌副丞相出則
督部郡能邇柔遠敷之以德教糾之以軍禁賞
慶信必憲令著明佐

主上等列文武賓屬蠻夷有召公分陝之重而
需方叔壯猷之施毗賴匪尠矧兩浙總領要區

綰帶江海茁葭徵於竹箭鈴鐸播乎勃鞞輕裘
坐鎮彈壓山川爲朝廷裨益更何量哉豫章石
閻劉公世業淵源以道德文章爲宇內冠冕銓
衡之水鑑無雙蘭臺之鵠儀不忒岱宗星樞望
而知爲公孤之宏軌矣旣奉命撫兩浙而降施
卓瑰有不容更僕數者中丞視汎歲不過浹旬
耳公初至遍歷海旁巖邑討問興革上下整肅
而居要除苛歸於不擾日省月試總材官蹶張

螿弧之先登磬控縱送務核其真而屯伍無虛
糜者提網挈綱因呂造律合兩浙利病之原精
神無所不注擘畫無所不該翕張緩急織巨方
圓潛謀龍變應機虎發赤子撫塵黃髮擊壤而
公之衽席溥矣城郭溝池濬治一新而民無寸
銖之費金粟爭貴平頒其興積而儲糧等於坻
京斥堠戒嚴睥睨傳柝萑苻遠徙潢池不波而
金湯儼化國焉海舶有禁樓櫓無譁蠓島鼉官

綽有定筭至於邦汭邦誣訛言若狂而公屹乎
山立貞度不搖韓魏公之經畫得宜文潞公之
靜治若寄古今人又寧遠哉內豎啣憲而出宵
人乘軒如蚊血國此省治第一蠹公抗䟽條便
宜悉收其螿民者而稜氛盡息則造福我浙且
并七閩三吳俱被宇下矣而公生平以性命之
學樹標司契六經闡奧心會身行盡掃諸儒之
陋每月進都養賜其欲言及監司縉紳各抒所

得而徐出片言以正其訛無不豁然神爽如長
庚之旦扶桑衡陽冥色盡洗至所云天地萬物
一體天下萬世一身古今無可由不可知之道
宣聖無使由不使知之心自洙泗以來罕有發
者王文成之傳萃於公矣而公之真修始於不
欺暗室若鳴琴瑟不爲無人而不調若行獨梁
不爲無人而不謹要在研幾功在慎獨寧彳亍
肇悅暖姝所敢比跡哉頃滿三載奏績於朝論

功高等當特進勲階給玉軸誥券蔭叙以世其
祿十一郡大夫嚙司使者暨杭九邑之長徵余
言稱慶不佞每覘公秉道不回清正無欲悶然
抱朴獨守其至德之藏凝然靜一不可輕測而
經綸廣豫當境順宜若因涼於夏因燠於冬聲
色不動而威稜四訖修之身發之事業道術勲
庸業已植基堅而播芳遠以稱名世大儒與社
稷重臣公真兩無忝哉天精之光佐明而現公

入毘聖德登豐保泰蘊抱宏遠在易之大有書
之塩梅仲山甫之王躬是保尹吉甫之文武爲
憲不佞不能妄贅卮言直以是爲諸君子進頌
矣

司理禹門毛公奏最序

代

往稽載籍李長源試方圓動靜之竒房喬擅聳
壑昂霄之譽而韋弘育以兩經登第荆子以化
溥惠康其人皆冲齡弱冠文爲國華政成世楷

若天授然何揮斥寬然有餘而卓犖難卒邁也
乃今觀同寅禹門毛公古今人未嘗遠矣公以
尚書起家聯標子丑魁禮闈宇內爭珍其文爲
駭犀步光浩浩乎若濤飛霧捲而挺立泰岱之
顛也然亦謂七秀三珠定以文雄耳及筮仕司
李武林而淵澄鍊達榮問蔚都黃髮愕爲神君
赤子倚爲衆父不佞官南中卽已欽爲則傲乃
不意承乏茲郡獲朝夕從事而益嘆羨公之天

授何闕也公才傾八斗而不自恃其才每事細
心營理務核其真識辨淄澠而不專憑其識擘
畫窾會不執我見陰陽上下之術有以譎究試
嘗之者公洞然如秦鏡之照膽飲上池水而垣
一方莫遁鬚眉也片語出聲寒慄膚髮久之而
人自不忍欺以爲設械徒自苦耳竒冤異獄有
數年不解者公曲訊旁探巧中飭筭如錢若水
之辨女奴活雙命而塑像投誠矣翼虎擅肥崖

柴當路如蚊三千佐內璫爲虐公鞠得情磔其
負隅者而次第鍛其憑陵獺徃魚潛一掃蒙翳
如孔道甫之楮笏擊蛇而奸怪無所施矣直指
廉公精操每事倚重十一郡利病燭照數計一
一條析而見之施行而旁午紛拏應以暇裕無
不曲中機宜高深畢徹如劉穆之之目送雙鴻
手揮五絃而百函並奏矣以至分校棘院而文
武皆其冠軍優禮儒黌而都養拂其羽翼蓋公

之所優爲者公自取之左右靡不逢源而休休
濟濟文質駢臻其隆施未有艾也語不云乎一
手獨拍雖疾無聲余不佞賦性樸魯歛揚在前
獨自信肝膽共輸良楛互效公以餘波潤余分
壁光照余皆足以文余之不逮而爽朗真誠皦
如白日玉山在望千人俱見數年以來若埴篔
合響桴鼓叶應卽宮商之調爲五音而玄黃之
燦爲五色不是過也公之夾輔我二三兄弟豈

有量哉丙辰冬公三載績滿上主爵者報最壘
書綸綽榮及二親而公年始壯公之二親亦始
踰艾長公孝廉又且修雲霄之翮騰驤在近矣
公以一身備人倫之樂而勲名遍浙滋覃輦轂
銓衡臺省虛席以待經濟方自此始世之企足
望公者儼如青陽播和百昌蕃育而不佞不徒
以是爲公榮也李鄴侯以布衣叅帷幄歷佐三
宗定社稷不拔之業夜枕九仙骨朝披一品衣

子姓通顯房玄齡十八登朝爲文皇元輔不負
髫年月旦天生偉人必有大用公之所得於天
者旣蚤且厚而醞釀苞毓瑰烈鴻聲安可以寸
黍測也二三僚友咸以不佞之言爲然屬諸副
墨爲公加爵而不佞亦自信非阿所好異日以
此爲券矣

錢塘鄒邑侯考最序

代

晉陵鄒黍回先生家學相承世擅登壇之長及

掄魁癸丑海內讀其文如屠耆之劔支國之香
光燦四照林笥壁槩競爲鴻秘頃綰符上邑順
道敷文膏沃風翔德化普洽頃三載績滿奏最
聖主嘉崇循良褒美異數旦夕可竣矣仁和周
侯偕七邑長以篋堦之誼徼一言爲頌余不佞
竊願徵治行於列侯而逡巡未敢發聲也夫遇
山子而詢巖洞之紆回執長年而諮島渚之夷
險則旁觀未必果清而導窾斯能游刃又聞著

三都者思逾十稔賦鸚鵡者筆不停綴則精麗
不殊而運杓自別所謂隨性曲成圓行方立不
佞遂以臆對而深有會於先生矣先生淵衷粹
度穆如清風桃李成蹊崑璵謝潤績學密於難
籜耽古劬於帶鋤一行作吏竒抱遂顯昔杜預
爲儒而湛精於六經居官而覃思於政事韞藉
旣宏經綸並暢不相遠矣邑稱繁劇支左誦右
而先生鎮靜暇豫囂諍不撓望若木鷄迅如奔

駟舉世之控揣與程量者皆不足衡萬一而至
其愷悌之心光明潔白識與不識咸拱手加額
曰鄒侯渾然聖心又曰確然古心而要一離一
真則洞徹表裏散珠聚璧無所不宜者也先生
神明燭照犴狴無寃兩造得情輕重必案以律
懸判語門外無敢上下其手者而錢糧夙弊率
以那借爲名振綱挈領遂追補四千餘兩肅清
無譁桀驁巨慙慣以人命誣訟恣其如蚊之螫

自頒式定時日傷痕密提相驗而黠者無所施
能復申禁左道陋民立寤而存恤孤寡予藥予
康予榷給賚不留畧分派不隔垣所全活甚衆
迺其細心擘畫興除井然自沿江各埠盤踞爲
奸停截中流播害不淺先生條爲六議勒石垂
不朽焉靈芝化灣閘護塘難於蓄泄頃議築八
字金口鎖其奔突之勢溢則闔旱則闢鄭白之
渠不是過矣而先生嘉惠學宮月有校歲有課

品其高下士無不振翼待飛影鞭越塊者都養
冷爨腹遂果然先生之所隆施於錢塘者罄竹
豈易書哉要俱根心爲政久而化成悶悶醇醇
沐浴玄澤悃悃遜名武健遜實管窺之見抑未
諗得當於先生否亟以詢之周侯侯與先生同
榜莫逆呼吸相應或質疑送難則千古之奧旨
乍宣或佐劇調甘則頃刻之桴鼓若合周侯每
稱心折服膺而先生亦曰吾伯仲朝夕樂所希

觀也周侯不鄙夷余言輒布之列侯卽以進之
先生先生其許之若云列清通簡要之司握鼎
鉉匡襄之重輿望攸屬
帝寵方隆先生凝厚端重天實有默俾之者當
不俟不佞臚宣以塞列侯之請矣

信安俞邑侯考最序

茂苑俞君宣先生金閨秀質才名夙茂爲文沉
摯淹緯有揮斥八極之思而以法爲御情赴景

合海內爭讀其文以爲氣徃鏢古詞來切今稱
蕤林中飛將而先生道韵清真寄致蕭遠居要
不苛處喧常寂與人交剴切樸素澹而有神貞
不違俗不佞夙預先生壇坫之末旣同籍鴈行
及先生對南宮縮符爲令而穆如冲如猶一日
也昔人稱見元紫芝名利之心頓盡與君宣對
坐少選丘壑獨存冰雪共映矣豈但不染世情
并世之喜駭讚詬寒煖合離俱如巖花自落沼

波無浪正容以俟之使人之意也消竒哉不佞
懷君宣有摠非塵可束不屑貌爲超之句友執
聽然曰去君宣非遠也西安亦囂陵之俗而先
生敬簡端化久而自洽獲上信下無關緣飾三
年以來蒲鞭削影卽上掠雲根下梢地足亦覺
有待之煩矣政不必師蓋公而廉能警惰清畏
人知百務不弛綱舉日振舊詩云縣官無箇事
蝴蝶飛上堦渾漠無爲之化恍然可想又云桑

柘影斜春社散家家扶得醉人歸太平風土一
再咏歌陰陰卧遊其下焉方今於西安見之矣
先生入乙卯浙闡所得多竒士吾里祝君堯觀
追風神駿果爲方臯所拔通都稱快頃先生奏
最褒章赫奕士民咸索綺語稱慶而堯觀獨問
諸花溪之邁士凌辰從小池新荷中滴數點曉
珠直抒所知不復作世語若云澹泊寧靜已具
經世大業此皆先生性自有之有識無不爲先

卷之三